



Telegram turunkan 133 kandungan pornografi, penipuan, jualan barang larangan sejak Januari

Oleh Suzalina Halid - November 9, 2023 @ 12:00pm

suzalina@bh.com.my

KUALA LUMPUR: Sebanyak 133 kandungan membabitkan penyebaran pornografi, aktiviti penipuan dan penjualan barang larangan, diturunkan daripada platform Telegram dalam tempoh 10 bulan pertama tahun ini.

Menteri Komunikasi dan Digital, Fahmi Fadzil, berkata kandungan itu diturunkan oleh pihak Telegram berdasarkan permohonan Suruhanjaya Komunikasi dan Multimedia Malaysia (MCMC).

"MCMC memandang serius dan mengambil langkah strategik bagi mengekang pelbagai permasalahan penyalahgunaan di platform Telegram yang menyalahi undang-undang negara, termasuk penyebaran kandungan pornografi, aktiviti penipuan dan penjualan barang larangan.

"Langkah libat urus antara agensi penguat kuasa dengan pihak Telegram sudah dan akan dilaksanakan secara berterusan bagi menambah baik proses serta tatacara dalam mengekang pelbagai permasalahan penyalahgunaan yang berlaku di platform itu," katanya dalam jawapan bertulis di Dewan Rakyat, semalam.

Beliau menjawab soalan Zulkifli Ismail (PN-Jasin) mengenai perkembangan rundingan dengan penyedia perkhidmatan telekomunikasi Telegram bagi mengekang jenayah keselamatan siber, pornografi dan penjualan barang larangan.